

E lo bay cuida y guia muchanan entre 0 y 14 año

ENTRANTE 1 DI NOVEMBER 1991 FUNDACION PA NOS MUCHANAN LO CUMINZA

ORANJESTAD(AAN) -- Desde 1986 diferente fundacion y organisacion entre otro Osticeba, Cede Aruba, YMCA, Creshnan, AHATA, Departamento di Asuntonan Social y personanan individual a traha a base di diferente necesidadnan ariba varios aspecto di cuida y guia di mucha aki na Aruba.

Den e periodo aki mas y mas atencion a worde poni ariba e cuida y guia di mucha na Aruba. Door di e diferente trabaomnan di organisacionnan ariba menciona a bira bisto cu ta necesario pa lanta un instancia, den forma di un fundacion, cu lo mester bay dirigi su mes primordialmente ariba e trabao di cuida y guia di mucha entre 0-14 año.

E dicho organisacionnan conhuntamente a traha un proyecto cu a worde entrega pa financiamento na Bernard van Leer Foundation, Gobierno di Aruba y Cede Aruba. Entre tanto e proyecto aki a worde acepta pa tur e tres instancianan.

Dia 12 di Juni 1991 e fundacion a bira un hecho. E fun-

dacion aki tin como homber "Fundacion Pa Nos Muchanan". E nomber aki ta papia pa su mes. E Fundacion Pa Nos Muchanan lo dirigi su mes primordialmente ariba e trabao di cuida y guia di mucha entre 0-14 año.

E meta mas principal di e fundacion ta lo siguiente:

1. Sostene centronan di cuida y guia di mucha, cu no ta dirigi nan mes ariba e tereno medico ni ortopedagogico, pa mucha di 0-14 año como meta pa expande y drecha e calidad di e cuida y guia y enseñanza di e muchanan aki.

2. Duna informacion na e pueblo di Aruba en general riba tereno di educacion, cuida y enseñanza di mucha. Puntanan di salida pa e fundacion ta:

- E fundacion lo usa e declaracion di e mucha di Nacionnan Uni como guia;

- Cuida y guia di mucha pafor di cas ta worde mira como un parti di educacion den familia. Pesey e fundacion lo dirigi su mes tanto ariba e sosten di e cuida y guia di mucha como ariba e educacion den familia door di

e mayoman di e muchanan den e edadnan menciona.

Tanto educacion den familia como cuida y guia di mucha lo mester tin un influencia positivo ariba desaroyo fisico, emocional, social y cognitivo di e mucha.

E fundacion ta trata di logra su metanan door di lanta un centro di coordinacion y informacion cu tin e siguiente tareanan:

- * Organisa y (laga) prepara cursonan, tayer di trabao, y entrenamiento pa e personal di e centronan di cuida y guia di mucha.

- * Duna informacion con pa educa mucha entre otro pa medio di encuentronan informativo y traha y reparti material di informacion

(folder etc.).

- * Lanta un centro di documentacion cu lo ta habri pa pueblo en general.

- * Crea y mantene un forma di comunicacion entre e centronan pa mucha.

- * Guia y conseha centronan pa mucha ariba diferente tereno.

- * Trece e puntanan di bista padilanti pa cu e bienestar di e desaroyo ariba e terenonan menciona cerca instancianan concerni por ehempel Gobierno y instancianan priva.

- * Stimula e cooperacion entre e centronan pa mucha y e instancianan cu tin di haber cu e cuida y guia di mucha.

- * Stimula y percura pa e intercambio di informacion den

region Caribense y internacional tocante cuida y guia di mucha.

- * Stimula investigacion pa mehora e cualidad di y tambe pa cu e necesidadnan pa cuida y guia di mucha.

Ta e intencion di Fundacion Pa Nos Muchanan pa emplea tres trahado, dos pedagogico y un administrador cu lo bay funciona den e centro di coordinacion y informacion.

E trahadornan pedagogiconan lo inventarisa e necesidadnan ariba e tereno di trabao. A base di e resultadonan y diferente otro informacionnan lo traha un plan di trabao. Intencion ta pa e centro menciona cuminza opera entrante 1 di November 1991.